



*Sabtu, 7 Agustus 2021*  
**Ogen: Esekiel 12:1-2**



*"Ermata La Erpengidah"*



**S**alah sada lirik lagu rohani siibaba Herwina Girjos Bangun, nina "Erpengidah, erpemegi, erpemeteh erpengangka, meteh mehuli, meteh sisalah, meteh si bujur, meteh si lepak" eme sada pengajuk man banta kerina i bas kita ngejapken kerna makeken si lit i bas kita jadi sada pasu-pasu man kegeluhenta. Sendah, Esekiel mereken sada gambaren uga nggeluh i tengah-tengah bangsa si pemberontak. Dibata mereken sada pengajuk man bana, gelah ieteh bangsa Israel e emekap nggeluh sidem alu perbeben si mesangat. I bas perbeben eme bangsa Israel nulak Dibata bas kegeluhenna.

Dibata ngambarken kerna kegeluhen bangsa pemberontak e alu la makeken kerna si lit ibas ia guna jadi pasu-pasu. Ermata la erpengidah, eme sada andingen si ibahan Dibata guna ncidahkan uga bangsa pemberontak e la makeken matana guna ngenin kemulian Dibata arah kerina dampar kegeluhenna. Mata e la erguna jadi sada dahin si mehuli si ibahan bangsa Israel bas kegeluhenna.

Uga nge ninta? Enggo nge sedekah enda kita makeken bagi arusna kerna biak tinepa Dibata si lit bas kita e? lirik lagu si pemena ndai ncidahkan uga eme biak si arusna sipakeken, erpengidah, erpemegi, erpemeteh ras erpengangkap gelah banci sidalanken si bujur guna tama kemulian man Dibata. Adi sedekah enda, kita makeken matata guna ngenin si la bujur maka gundari nari, mata e jadi salah sada tinepa Dibata si meherga si ipake ngidah kerna kinibujuren bas kegeluhenta. Temanta sendah jadi sada kata persinget gelah kita la bali bagi kegeluhen bangsa Israel ndai si makeken matana guna ngenin kerna kinilabujuren seh maka banci sikataken ermata la erpengidah. Sabap, kita itepa guna ndalanken bagi sura-sura Dibata. Esekiel pe ngasup mabai dirina jadi sekalak si pentar guna ngidah kerna si mehuli.

